

RABU, 25^{HB} APRIL, 1973

***1. Tuan V. David** minta Perdana Menteri menyatakan samada beliau akan menimbang melantik satu suruhanjaya yang diketuai oleh seorang hakim Mahkamah Tinggi untuk mengulangkaji gaji-gaji mata-mata yang mana perlu disemak memandangkan kenaikan belanja hidup.

***2. Tuan Lim Cho Hock** minta Menteri Pertahanan menyatakan bilakah Kerajaan akan menubuhkan satu pasukan Tentera Malaysia yang berbilang kaum.

***3. Tuan Lim Kit Siang** minta Perdana Menteri menyatakan samada Kerajaan bercadang untuk menyusun semula sempadan-sempadan kawasan parlimen dan dewan undangan negeri sebelum pilihanraya umum akan datang; atau samada sebarang susunan baru sempadan-sempadan kawasan mengundi akan dikuatkuasakan selepas pilihanraya yang akan datang dan berikan butir-butir mengenai penyusunan-penyusunan yang dicadangkan itu.

***4. Dr Chen Man Hin** minta Perdana Menteri menyatakan bilakah laporan pertengahan tentang kemajuan Rancangan Malaysia Kedua akan dibentangkan di Parlimen untuk dibincang dan dibahaskan.

***5. Tuan Hor Cheok Foon** minta Menteri Luar Negeri menyatakan samada Malaysia telah membuat keputusan hendak menarik diri dari Perjanjian Pertahanan Lima Kuasa dan menutup semua markas-markas negara asing yang ada di negara ini sekarang.

***6. Dr Tan Chee Khoon** bertanya kepada Menteri Luar Negeri samada beliau sedar terhadap satu kenyataan yang dibuat oleh Tun Adam Malik di Jakarta pada 29-11-72 yang menyatakan bahawa Perjanjian Pertahanan Lima Negara adalah berbentuk sementara dan sebaik sahaja tamat perang Vietnam maka pengkalan-pengkalan asing yang ada sekarang tidak lagi perlu, dan jika ya, adakah dasar ini selaras dengan dasar Kerajaan.

***7. Tuan V. David** minta Menteri Luar Negeri menyatakan samada benar bahawa Kerajaan bercadang untuk mengadakan perhubungan diplomatik dengan Vietnam Utara, dan jika ya, bilakah perhubungan diplomatik sepenuhnya akan diadakan dengan Vietnam Utara hingga ke peringkat Kedutaan.

***8. Tuan V. David** minta Menteri Luar Negeri menyatakan:

- (a) langkah-langkah yang telah diambil berhubung dengan keselamatan Kedutaan-kedutaan Malaysia di luar negeri; dan
- (b) samada mereka yang bertanggungjawab bagi keselamatan adalah mendapat latihan sepenuhnya ataupun samada mereka diambil bekerja secara sesuka hati.

***9. Tuan Loh Jee Mee** minta Menteri Hal Ehwal Dalam Negeri menyatakan mengapakah jawatan Ketua Polis Negara masih kosong lagi.

***10. Tuan Peter Paul Dason** minta Menteri Kerja Raya dan Tenaga memberikan suatu laporan kemajuan berkenaan dengan projek-projek yang di bawah ini dan jumlah wang yang dibelanjakan setakat ini:

- (a) jalanraya di antara Pantai Timur dan Pantai Barat;
- (b) jambatan bagi menyambung Pulau Pinang dengan tanah besar; dan
- (c) kemajuan dan perkembangan landasan Lapangan Terbang Bayan Lepas yang dicadangkan itu.

***11. Tuan Haji Mawardi bin Lebai Teh** minta Menteri Pelajaran menyatakan samada Kerajaan telah menerima suatu laporan dari rombongan yang dihantar ke negeri-negeri Timur Tengah untuk menaksir taraf Pengajian Islam di universiti-universiti di sana, suatu langkah yang dibuat ke arah pengiktirafan ijazah-ijazah universiti dari negeri-negeri Timur Tengah; jika ya, nyatakan mengapa suatu keputusan belum lagi dibuat dan jika tidak, mengapa.

***12. Tuan Haji Mawardi bin Lebai Teh** minta Menteri Pelajaran menyatakan samada Kerajaan bercadang hendak mengiktiraf sijil tertinggi Yayasan Pengajian Tinggi Islam Nilam Puri, Kelantan; jika tidak, mengapa.

***13. Tuan Hor Cheok Foon** minta Menteri Perhubungan menyatakan:

- (a) bilakah hasil penyiasatan berkenaan keadaan lalulintas di Kuala Lumpur yang dijalankan oleh seorang pakar lalulintas dari Amerika akan dikeluarkan;
- (b) jumlah wang yang dibelanjakan ke atas projek ini; dan
- (c) samada terdapat pakar-pakar yang berkelayakan di negara ini, dan jika ya, mengapakah mereka tidak ditugaskan untuk menjalankan kerja ini.

***14. Dr Chen Man Hin** minta Menteri Kebajikan Am membuat laporan tentang betapa banyak kekurangan air dan makanan di Sabah akibat kemarau, dan samada langkah-langkah yang cukup telah diambil untuk mengurangkan penderitaan mereka yang terlibat.

***15. Tuan Lim Kit Siang** minta Menteri Pertahanan menyatakan apakah langkah-langkah yang Kerajaan sedang ambil untuk menjadikan perkhidmatan tentera berbilang kaum supaya ia mencerminkan komposisi kaum-kaum di negara ini.

***16. Tuan Haji Mawardi bin Lebai Teh** minta Menteri Pertahanan menyatakan:

- (a) mengapa sebuah pesawat terbang Bulldog jatuh terhempas semasa pertunjukan udara di Pesta Ria yang dianjurkan oleh Angkatan Tentera di Lapangan Terbang Kepala Batas, Alor Star pada 9-3-73 jam 5.30 petang dan menyebabkan 7 orang awam dari Kampung Telok terkorban;
- (b) samada benar bahawa kemalangan itu berlaku oleh sebab pesawat terbang itu terbang terlalu rendah berhampiran dengan orang ramai yang menyaksikan pertunjukan itu; dan
- (c) bantuan yang diberi kepada mereka yang terlibat di dalam kemalangan itu.

***17. Tuan Haji Abdul Wahab bin Yusus** minta Menteri Perdagangan dan Perindustrian menyatakan apakah sehingga ini peranan pemodal Jepun dalam penanaman modal di Malaysia, adakah mereka khuatir menanam modal dalam negeri ini dan apakah langkah-langkah yang diambil supaya mereka menaruh kepercayaan penuh terhadap Malaysia.

***18. Tuan Su Liang Yu** minta Menteri Kemajuan Tanah dan Menteri Tugas-tugas Khas menyatakan berapa banyak wang yang telah dibelanjakan oleh FELDA

pada tiap-tiap tahun semenjak penubuhannya untuk membayar gaji-gaji dan elaun-elaun pegawai-pegawai FELDA dan nyatakan bilangan pegawai-pegawai mengikut bangsa.

***19. Tuan Chan Fu King** minta Timbalan Perdana Menteri menyatakan samada beliau telah membuat satu lawatan sulit ke Republik Rakyat Cina, dan jika ya, berikan butir-butirnya.

***20. Tuan Chan Fu King** minta Perdana Menteri menyatakan samada beliau sedar bahawa usaha mendaftar pengundi-pengundi (electoral rolls) telah terlewat dijalankan di beberapa kawasan di dalam negara kita dan daftar pengundi tidak ditunjukkan untuk diperiksa oleh orang ramai yang terpaksa berjalan jauh untuk memeriksa samada nama mereka telah didaftarkan; jika ya, apakah langkah-langkah Kementerian beliau telah ambil untuk menjamin supaya perkara-perkara tersebut tidak akan berlaku lagi di masa yang akan datang dan samada pengundi-pengundi diberi kad akuan penerimaan setelah nama mereka didaftarkan; jika ya, mengapa beribu-ribu pengundi yang telah mendaftar nama mereka tidak menerima kad-kad ini.

***21. Tuan Fan Yew Teng** minta Menteri Luar Negeri menyatakan samada Kerajaan akan menimbang menubuh hubungan diplomatik dengan Albania.

***22. Dr S. Seevaratnam** minta Perdana Menteri menyatakan dengan tegas apa jenis bantuan Kerajaan bercadang hendak beri kepada negara-negara Indo-Cina dalam usaha-usaha mereka membina ekonomi dan tentera mereka.

***23. Dr S. Seevaratnam** minta Menteri Hal Ehwal Dalam Negeri menyatakan jumlah bilangan sijil-sijil kerakyatan Artikul 30 yang telah diterima untuk pengesahan, mulai dari 1hb Januari, 1973 hingga 31hb Mac, 1973 dan menyatakan jumlah bilangan sijil-sijil yang didapati betul dan jumlah bilangan yang telah dibatalkan.

***24. Tuan Edmund Langu anak Saga** minta Menteri Perusahaan Utama menyatakan oleh kerana Sarawak mengeluarkan 180,000 tong minyak petrol sehari, mengapa minyak petrol untuk moto-sangkut di Sarawak sangat mahal iaitu berharga \$2.60 segelen di bandar-bandar kecil. Apa tindakan yang diambil untuk menurunkan harga minyak petrol ini sekira-kira tidak menyusahkan orang-orang kampung di Sarawak.

***25. Tuan Edwin anak Tangkun** minta Menteri Pertanian dan Perikanan menyatakan bilakah Kerajaan akan memulakan tanaman padi dua kali setahun di Sarawak memandangkan kepada tingginya harga beras dan selalu kekurangan beras.

***26. Raja Nong Chik bin Raja Ishak** minta Menteri Kerja Raya dan Tenaga menyatakan samada beliau sedar bahawa Kerajaan telah berjanji untuk membina sebuah jambatan di Kuala Selangor semenjak tahun 1970 dan setiap kali perkara ini dibangkitkan, jawapan yang diberi adalah samada jambatan itu akan dibina dalam tahun yang berikutnya, ataupun pelannya masih lagi berada di atas meja,

ataupun tapak untuk jambatan itu masih lagi di dalam kajian dan perkara ini telah berlarutan sudah hampir-hampir tiga tahun, dan jika ya, bilakah dengan tepatnya jambatan itu akan dibina.

***27. Tuan Mustapha bin Hussain** bertanya kepada Menteri Luar Negeri samada Malaysia akan menyokong Kerajaan Panama dalam pertikaianya dengan Amerika Syarikat mengenai masalah Terusan Panama, dan jika tidak, mengapa.

***28. Tuan Mustapha bin Hussain** minta Menteri Luar Negeri menyatakan samada Amerika Syarikat menyokong konsep kita mengenai Perkecualian Asia Tenggara,

***29. Dr A. Soorian** minta Menteri Kebajikan Am menyatakan:

(a) apakah bantuan yang telah diberikan oleh Jabatan Kebajikan Am kepada keluarga-keluarga yang malang di dalam trajidi Amok di Titian Akar, Lubok Cina, Negeri Sembilan; dan

(b) apakah bantuan sagu hati yang telah diberikan kepada keluarga-keluarga Polis-polis hutan yang terbunuh iaitu Encik Yahaya bin Hassan dan Encik Roslan bin Yahaya.

***30. Dr A. Soorian** minta Menteri Perhubungan menyatakan sebab-sebab pemberhentian Encik Rama Iyer sebagai pengerusi MAS.